

國朝畿輔詩傳

國朝畿輔詩傳卷五十二

長洲陶

樑堯鄰輯

錢塘吳長卿更生校

馬允剛

允剛字見一號雨峯開州人乾隆五十三年舉

人官安徽池州府知府

劉大觀書馬雨峯大令署陽西縣禦寇事明鐵  
忠烈公死建人神有經歷朱某負義挾忠烈二  
子逃開州長德李氏次匿馬氏遂從其姓雨峯  
氏馬蓋忠烈次子後世以孝廉奉奉中嘉慶戊  
午七月奉檢軍檄轉洵甘肅協川軍麥十萬石  
赴畧陽濟軍食運至賊高三馬五餘黨有先聲  
寇畧陽鄉民恐陷賊倍哀穉避難城中武弁閉  
賊勿納雨峯曰城以衛民不納民奚往出城督  
民囊麥入城須臾麥盡賊已半渡嘉陵江矣賊  
攻城城門朽敵雨峯以麥囊堵城恃以無恐三

日大兵至賊解圍去已未八月任沔縣賊勢方  
張戕掠無算蹀躞父老築堡四十餘處賊枝窮  
秋毫不能掠取時羣以築堡爲迂怪未幾朝  
廷有堅壁清野之命大吏檄州邑築堡同僚始  
服其先見方賊圍河請發鉛丸火藥以爲備軍  
門斬之雨峯以火藥一囊分十餘囊多製竹籠  
籠標一旗曰軍需火藥其可須臾運畢  
者乃令民間崇日運之賊聞有備而去  
紅豆樹館詩話兩峯在沔縣與賊相持最久賊  
渠羅半年者尤凶狡匿于縣之鐵鑪川茅壩等  
處出沒爲害兩峯親督鄉兵攻戰三晝夜川連  
枷棍法破其長牙生擒半年械赴漢中戮之十  
一年七月王文龍蒲大方等鼓噪爲亂削平後  
奉檄撫卹凋弊周巡林箐目擊居民焚掠之慘  
賦哀鴻篇歎災行諸詩紀  
事有元次山春陵遺響

築寨行

有序

予於嘉慶四年八月初四日授沔縣事時教匪

充斥軍事旁午境內民舍被焚奔竄流離目不忍觀因率里民修堡築寨共平地修堡四十處山中築寨百餘處自此民得安居賊不能擾爲  
築寨行

朝廷設州縣安民最爲先奈何教匪興親見此顛連遺孽起川楚奸黠動烽烟滋蔓漢興地焚掠徧山川閭閻日奔逃難期生命全山城當衝途供支已可憐况復無寧日常官眞憂煎因念堡與寨嘉謨畱前賢率此凋殘民共効鋪番緣平川可修堡垣墉保市廛山頭可築寨木石期崇堅或如飛鳥巢高居雲漢邊或如猛獸穴幽

邃林谷偏或如雲中梯猿狖愁攀聯或如海中蜃鶴鶴  
來踟躕或據高山頂或倚長林巔綢繆瑾牖戶轆轤排  
桷椽兒童爭藏匿姻婭相周旋儼若得異術雞犬共昇  
仙遙遙人語迴渺渺炊烟絲最愁風雨至榱桷爭翩翾  
巢居豈不危暫期避戈鋌登陡豈不勞且可免刀弦悲  
哉此哀鴻中澤聲涕漣我愧爲民牧無才甘速遘爲此  
歌哀曲上徹蒼蒼天何日紓此禍南畝力耕田隴上一  
豚蹄穰穰祝豐年

甲子清明後二日遊韋杜飲牛頭寺題壁

韋杜遺蹤在千秋尺五名天桃仍吐豔稚柳尙含情古

剗僧迎客春林鳥弄聲年來煩案牘此日覺心清  
本是風塵吏乘閒學勝遊春濃楊柳陌花映夕陽樓聯  
句飛詩筆開尊借酒籌同心復同賞宦蹟任悠悠

輓洋縣殉難曾公

歎息梁洋地頻年亂未平妖氛初滅火蟻賊又翻營百  
姓流離甚官僚去住輕感君持大義一死爲蒼生

叛兵之變石泉被困陳一峯明府堅守卻賊城賴

以全因贈

相逢戎馬聽鳴騶邑宰爭傳陳太邱如斗孤城資保障  
干霄義氣撼貔貅驚傳烽火千山熾倏見妖氛一旦收

韓范威名真不愧酒酣長嘯撫吳鉤

石泉寓館

落拓風塵逐隊行催科撫字兩無成  
棧雲高處頻驅馬畫角林間幾餉兵  
未復凋殘知政拙敢因淡泊說官清  
旅懷岑寂攤書卷慚對千秋循吏名

過饒峯

疊疊寒山翠幾重興元奇險說饒峯  
數家村落依殘壘半嶺寒鴉下夕春  
戰血年來縈碧草行人經過說烟烽  
臨風欲問前朝事今古茫茫感舊蹤

王發楠

發楠字楚良號石萼正定人榮勣子乾隆五十三年貢生官永清縣教諭有鴻泥書屋詩草一

卷

王承楷傳先生內行醇篤以孝友聞性和易學問淹雅凡經史百家及金石圖書無不考證詩確官永清河決永定邑當其衝時令有他役先生偕同僚登城防守竭七日夜力城卒全

己未在涿鹿借胡醉楓酉陽雜俎讀之偶有所觸

輒仿淵明讀山海經東坡讀抱樸子體爲詩

高宗纔扶牀弄筆成草勅獨惑一女子唐幾不血食武氏亦天授讀檄不改色憐才罪宰輔一言三歎息生感雌雉唯何異牝雞索指上一縷毫長乃逾咫尺



唐室勘內亂英辟惟明皇如何尋覆轍武韋以及楊祿  
兒邀寵賚寶輦檀香牀藥童昔賢子爲煎五朮湯張設  
鵝毛氈兼令瑤令光直言不能入礎碎仙人藏大寶旣  
禪授西內何蒼涼惟有梨園巾猶染龍腦香

無膺心不朽百年復爲兒木飲仰樹汁仍建候雨施馬  
流二百戶今猶繫其支獠人頭夜飛食蜎甘如飴昔嘗  
讀赤雅湛若親見之造化何不有斯言安足疑

奔鱗頭上竅聲氣出赫赫寄居有郭索乃與蝸同宅尺  
木長未成龍猶潛沮澤猛虎雖善鬪或被蝘蝓隄河伯  
小從事放墨還自賊

連日讀少陵遊秦入蜀諸詩夜忽夢在棧道中行  
有聲如鼓角衆譁言虎獮也遂于馬上吟詩既  
醒頗能記誦時壬戌七月二十九日也

日暮蜀天窄山深棧道迴陰沈萬木下雪湧一江來聞  
虎心逾壯看人色欲灰死生同患難何益費驚猜

題畫

颯颯秋風木葉稀危亭臨水對殘暉高人採藥知何處  
一徑橫斜入翠微

劉之睿

之睿字濬川遷安人乾隆五十四年進士官陝

西鎮安縣知縣

輓馬葵園

文章經濟紹前徽餘韻猶然在遠畿殘局棋終長日永  
閒庭花落訟書稀千金結客迎珠履一劍從戎著鐵衣  
歎息風流今已逝渭川楊柳自依依

邊士培

士培字滋亭號篤之任邱人中寶孫乾隆五十

四年舉人官山東鄒縣知縣有延香書屋詩草

任邱縣志士培初授山西柴河令兩充鄉試同  
考官所得皆知名士丁艱服闋改授山東樂安  
令樂安舊有書院歲久傾圮捐俸修理俾諸生  
肄業其中調鄒縣鄒俗健訟有盧姓孀婦撫幼

子旗人歎凌孤寡汗蠟妄控士  
培爲雪其冤引疾歸卒于家

途中苦雨

炎歊欣暫滅，靈雨復霏霏。  
盡日溪雲起，滿山石燕飛。  
潦深愁沒馬，霧長訝侵衣。  
四牡懷歸切，風塵願莫違。

天雄關

在昭化縣

雲棧通巴域，雄關扼蜀邦。  
奇峯高莫極，天險古無雙。  
山麓開沙徑，溪坳架石杠。  
控鞏愁馬蹶，坐看倩人扛。  
紺刹何年建，疏鐘傍晚撞。  
敲崖松謾謾，穿洞水淙淙。  
霞拱撐危閣，風鈴掣寶幢。  
鳥飛平過檻，雲出近遮窗。  
地勢連秦雍，河聲走漢江。  
人乘果下馬，賈泛木蘭艫。  
縱目搗藤漿。

開懷放玉缸塵襟真盪滌仙界遠紛靡履險心常坦乘  
風志未降便思追禦寇環佩響琤琮

舒其紹

其紹字味禪號屢堂任邱人乾隆五十四年舉  
人官浙江長興縣知縣

懷人詩

張平林提舉

海上神仙不可遇釣竿且挂珊瑚樹滄桑幻境日茫茫  
指點經過前度路蕭蕭風雨鳳城邊話盡殘更未忍眠  
昆明池水聲嗚咽廿年長作銷魂別

方筠亭太守

三十功名願已足五湖一棹烟波綠館娃宮裏響簾廊  
春風日聽吳娘曲江花塞草路漫漫惜別徵歌強笑歡  
十年底事貪雞肋恨不醉死陶家側

張藍浦刺史

世間萬事無不有白衣變幻如蒼狗越人車笠誓雞壇  
雲雨俄驚反覆手毘陵別緒太怱怱搥鼓船頭雪打篷  
解衣衣我泣如雨誰道今人不如古

陳春旭大尹

雄談不數陳驚座富貴浮華輕涕唾  
襤褐論交卿相間

坦步都門送臨賀卽今手版趨三韓把酒題詩向夜闌  
莫歎沈淪不得意邗連更有傷心地

元禹陞元戎

仗劍出門天欲雪一腔肝膽向人熱那能新婦坐帷車  
醉射黃麋生飲血歸裝賸得一錢無十萬猶聞召博徒  
陣前殺賊如蒿草勳名信是兜鍪好

德一村大尹

黃雲壓城北風吼老鴉啞啞啼枯柳陽關欲出故人來  
且醉胡姬鑑畔酒交情自昔散黃金金盡空餘此日心  
孤山匿匿香風滿誰寄梅花過壠坂

邊志醇

志醇字述尊號酉塘任邱人聖照子乾隆五十四年舉人官廣寧縣教諭有十笏齋詩草

乙丑春日望醫巫閭山

醫巫閭高欲摩蒼天巉峩作鎮臨丹淵六重掩抱勢合  
沓萬丈危聳生雲烟雖有重岡疊嶂作階級誰能飄然  
飛步凌其巔東與長白山作犄角西與紅螺松嶺相  
鈞連南瞻駝磯鳥北至武臺邊中有茅菴古刹七十二  
窟宅往往棲羣仙我來司鐸託山麓齋舍朝夕覘噴吮  
探奇自謂似康樂嚴冬霜雪偏漫漫真成蓬萊三峯可



望不可卽但從琉璃世界看玉山近已晴和轉陽律鬱  
蔥佳氣輝堂偏詰朝定擬尋山買蠟屐肯學昌黎畏怯  
施重瓊

寄友

寂寥誰與語攤卷度年華鳥下無人院風搖不語花任  
教愁作海肯借醉爲家謝草探囊滿歸來向爾誇

張靖

靖字青立天津人標子乾隆五十四年拔貢生  
官浙江浦江縣知縣

秋日書懷

秋草沒牆根閒情獨倚門黃花籬下酒紅葉雨中村且  
喜琴書共須知道義存升沈應有數底事莫重論

邵葆醇

葆醇字陸民號菘疇宛平人庾曾子乾隆五十  
五年進士歷官福建臺灣府同知有韓華吟舫  
詩鈔一卷

邳州道中

將曉雷明鏡殘輝照客顏寒沙微有樹薄霧不成山村  
遠雞聲近秋涼馬意閒生平追勝蹟今日傍江關

送張船山太史乞假還蜀

到處狂歌擊鉢催吟壇人競豔鄒枚宦情閒似隨孤鶴  
歸思濃于釀舊醅嶽色河聲連蜀道酒痕塵影憶燕臺  
他時重話春明雨喜有新詩滿篋回

辛酉解餉赴蘭州歸途書懷

幕府文書轉餉遙邊城征馬去蕭蕭天連紫塞二千里  
人到黃河第一橋秋氣祇應悲宋玉壯心猶自說班超  
漫言烽火頻經地笑向沙場倩酒澆

亂峯高下入西州茲事平生亦快遊故壘千年曾轉戰  
空山六月似深秋涼颼隱隱生虛壑絕頂盤盤立戍樓  
極目金城亭障遠思鄉懷古共悠悠

宦客馳驅負半生門閭倚徯淚縱橫爲憐杼柚東人賦  
又佩弓刀塞上行書寄海天愁絕域夢迴秦月數歸程  
春暉寸草吟遊子難慰堂前白髮情

古驛空濛斥堠開隴頭流水聽潺潺何人夢斷荒雞舞  
有客情同倦鳥還異地班荆重話舊中年對酒強開顏  
灞橋又是銷魂地槐葉森森暮出關

淮陽途次

去日榴花照眼紅歸來黃菊繞籬東短衣匹馬半天下  
隴樹秦雲猶夢中秋老河梁辭社燕月寒關塞送賓鴻  
莫嗟行路難如此苦戰頻年壁壘空

癸亥立春日萊城書懷

又是東風轉斗杓，漸舒青眼柳千條。  
山城地迴春難到，海國天寒雪未消。  
官裏心情燈似訴，客中魂夢酒頻澆。  
者番真箇歸期近，一事差堪慰寂寥。

征鞭昨指古涼州，爛醉蒲桃汗漫游。  
隴坂河流通大夏，滿橋柳色曳初秋。  
故人惜別新詩少，獨客逢春往夢留。  
欲請長纓還自問，幾曾簿領得封侯。

白溝懷古

開國詒謀弱勢成，子孫啟土自連兵。  
大書難洗澶淵恥，歲幣徒寒海上盟。  
叔夜北來心慷慨，文山南望淚縱橫。

瓦橋關外波流急一綫何如萬里城

微雨渡江

去雷蹤蹟豈關人一棹烟波自在身  
魂夢東山經歲別樓臺北固入秋新  
天盤危塔橫飛鳥雨灑空江濯巨鱗  
聞說中泠泉勝絕昔賢何事苦思莼

淮水懷古

持節王齊意詎猜決囊破楚勢如摧  
興亡劉項眞操券生死良平總如才  
戰骨已隨秋草沒殘沙猶擁海潮回  
英雄兒女都消盡落日中流鼓楫來

王定柱

定柱字于一號椒園正定人乾隆五十五年進

士歷官浙江按察使有鴻泥吟椒園詩贖

紅豆樹館詩話先生初選雲南師宗令由京赴滇著鴻泥日錄四卷丙寅入都著續錄四卷紀山川風土仿陸放翁入蜀記樓攻媿北行日錄保山袁文揆序之謂能質有其文情韻兼至先生博覽好古不廢考訂近日餘姚翁元圻鳳西撰困學紀聞注與先生參稽指畫多所發明又著有學庸古義老子注椒園文集若干卷

南皮張烈婦詩

瑤池覲仙靈宮闕鬱菁蔥梧桐一千尺和鳴雙鳳凰何時謫墮地化作琪樹雙婉婉蘭闈秀家世儀周京大人富文史結綬宰名邦少小秉淑姿窈窕而溫良儀度出

神仙玉骨冰雪腸七歲嫻禮儀十歲曉詞章十二女紅  
畢裁素織流黃綽約十三四蘭桂揚春芳十五上鸞笄  
有客人門來捧手白阿翁嚙嚙前致詞云有張公子十  
五抱雋才刮竹著羽竒此郎貴不疑家世君所知觀察  
領數州轉漕制千里夾轂雙鳴騶知君有好女嬌惜如  
明珠年齊德亦埒下意輒相求兔絲附女蘿可得共命  
不阿翁大歡欣舉手爲客言此郎旣夙識恂雅復能文  
門祚兼不惡况接里閭間感荷區區意百可當何云輒  
便相聽許私心亦愜焉客返締盟言燕婉從茲始桂華  
冰泮初笙歌備百禮騎從闔廣陌筐篚溢庭除棗栗爲



嘉讖鳧雁雞羊豬羅綺二百箱掄翟在上頭寶釵三十  
六瑟瑟間珊瑚掩涕入青廬含悲別父母生女定何益  
去親爲人婦康樂莫相念憂思損年壽努力加餐飯臨  
辭重回首上堂見舅姑舅姑大歡喜令父好家範進退  
稱人指衰老藉扶持願汝多繁祉好在相扶將小姑小  
郎子再拜歸房中見夫面發紅琴瑟一時軫人生百事  
終蘭窗足圖史羅幌搖清風郎讀妾刀尺夜夜寒秋燈  
人生一何促願君及朝陽風雲有時會變化爲鯤鵬鴻  
案四五年星斗搖文江指顧拔幟登卓犖閭闔中造化  
非忌才何爲降酷毒疋癰辭卷牘羸頓親牀蓐膏肓二

豎逃鍼藥百手束瞳目戀襁兒聲暗淚還續握手涕闌  
珊對此摧心肝君身諒不諱妾命豈獨完銀河澄清曙  
北斗正當門匕首白差差瀝血誓帝天髮膚豈不愛蓮  
此絕命辰未殉身已死何慘土壤間脫手飛玉雪羅襦  
灑血殷誠堅眞宰泣滴滿列仙還五年伉儷情人生竟  
如此夜臺風景惡忍令君獨死入地會相見未敢刑鼻  
耳願君少相待攜手黃泉裏上堂辭舅姑舅姑涕滿巾  
新婦負苦辛茶蓼丁衰門下有黃口兒一髮千鈞縣願  
無作死計相扶度朝昏小姑下堂來拭我雙嚔痕願此  
兩垂白知復當幾年人生一世間衰草棲驚塵願勿作

死計努力愈來昆長跽白舅姑願尊自珍惜新婦魂已  
斷虛活定何益旣悴心力盡不能奉顏色小郎夙孝謹  
足以慰遲夕孤穉依翁叔寔異在母側况復賃乳媪誠  
謹心專壹新婦事已辦逝將歸幽室但恐先逝者怪我  
多引日詞終再拜退還歸入我房訓狐啼清晝愁燐飛  
空牀拂拭君几硯淚綆殘紅冰貌君著素壁耿耿秋蟾  
光月魄有圓缺妾志無參商舉手謝父母畢命朱絲繩  
魂當隨君去尸還挂君旁生生與世世魂魄莫相忘舅  
姑淚如瀉小姑涕淋漓鄰里相歎詫綽楔表其鄉賤子  
拜下風敬祝一瓣香願君雙比翼帝錫壽而康生作忠

孝人以爲世紀綱乾坤爲清熙河嶽不驚崩應知瑤臺  
上雙鳳復來翔

華嚴洞

我聞華嚴海佛義大方廣調御兩足尊人天衆皈仰密  
行普賢修圓慧曼殊長善財五十三轉轉竿頭上巍巍  
功德山風雲變靈響芥子與須彌恢含妙無兩何時耆  
闍峯分此一竅爽洪濛孕離奇太清耀虛朗巖危神物  
持龕幽造化獎六藏蟄寶龜狂馴絡香象宏慈奠奧區  
陰泉闕懍悅稽首契真空大千皆鼠壤洞門一片石光  
明韜煜晃手捫儼膚澤側臨出妙像傳聞邈邈仙貽此

狡猶賞天子馳蒲輪其蹤忽已往燕飛入樓臺月沈落  
林莽一絲衆烈扶餘臘空王養胡濙亦何爲求仙無力  
廷殘碑自靈妙古懷俄悵惘太息望長陵不及蒲園享  
人事任謬悠寶界無塵埃卻漱石湑寒慈雲寄翹想

奇石敬用漁洋揭鉢圖韻

巖石自瀆獷儉絕屠沽兒細石雖娟潤頗愧脂韋師白  
塔村左千石頽森束戈甲發旌旗秀拔俶詭誰能爲如  
人嗟立齊肩雁後者如憩前如馳望如掄腕相警皆踊  
如虎攫蛟騰踞奔如追尋顧如遺綴如縈纒糜髓狸奮  
如揚鉦震靈夔朱亥背裂竿植彤穆如禦寇杜德機詹

尹正襟方然龜憤如靈胥樹檟悲慷慨鷲殺霜鐔鉞慄  
如呂梁下履危喜如絕纓談解頤如幄如帳連岡彌想  
像羽扇天人姿仆如伏鑽葉街口騫如旄頭揚旌毳或  
如蓬條如戍施如撞如距如漣澳鱧結如徠驃徹夷交  
肱扣額勾恩慈肌膚迸坼羅癩瘻軼聞荒唐傳者誰我  
昔彷彿曾聞之干隊宵征氣淋漓居者隱闐闐銖釐天  
雞一鳴立若癡晨看化石依榛茨飽饜風露無渴飢幽  
怪難入轡軒詩我采瓊瑰瑞鋤犁旁詢齊諧恢卮詞摩  
凍那惜右手抵南山雄構誰容追投筆拊案三嗟咨

再別鎮遠山水

人生熱宦何時足手版腰章三斗俗青山碧澗欲移文  
卻將從禽占卽鹿開襟不解貯烟霞何用便人負腹  
我生百事淡欲忘惟有看山樂事獨遊蹤直盡天南頭  
每爲靈奇畱信宿况更馳驅華鬢催泥痕過眼皆風燭  
林巒供養緣久慳空遣齒牙流臙馥黔山初到曾盪胸  
嵐如翠黛波如玉十七年內四經過鹿蕉尙未黃梁熟  
窮邊盾劍五暑寒暫游便覺間身福治中別駕古何人  
今非驥騁容貂續一別金碧向京塵雨雪三旬苦迫促  
重過勝地離思濃擬覓生綃寫洪谷那期塵鞅易羈縈  
仍遣足音限游躅匝月初逢霽日鮮殘陰猶怯春雲簇

一篙新漲泛清濤，雖阻龍登容私淑。買船且趁黃棉煖，  
小桃淺絳輕篁綠。真慚宿諾迂，山靈息壤刻詩還。自讀

雷雨

瀑急船初繫，灘昏雨驟來。風威動檣櫓，水氣壓亭臺。夜  
窟蛟螭靖，蠻雲瘴癘開。低徊江漢地，失箸憶雄才。

晨寒

中嶺變陰晴，新寒病骨驚。磯腰摩石過，水面壓雲行。拙  
漸疏吟興，衰應減宦情。牽船人病涉，嗟爾亦蒼生。

渡黃河

形勝中邦最，河流萬水尊。千帆互吞吐，一帶控乾坤。搓



影凌天漢濤聲撼禹門祇應濟川者擊楫誓酬恩

過洞庭

打鼓畫揚舫長風度洞庭寒吞初日白浪失暮山青  
野包三楚魚龍舞百靈利帆何處泊鐙火出烟汀

蘆林潭元日作

漠漠輕陰側側寒長隄春到似長安聊存世法名添歲  
試製新爐紀履端地少親賓文貌簡惠沾廝養酒腸寬  
遙知稚子斑衣舞一樣和風兩地歡

初見黔山

到黔山水亦清嘉雜樹垂厓半欲花船背波光飛倒影

山腰雨氣壓晴霞  
平橋策策通漁港  
樵徑盤盤近酒家  
驚斷蓬窗千里夢  
瀑流吹落翠筠斜

李元禮祠

破柱禱羊志已伸  
龍門尺地迴嶙峋  
東京祚盡摧山斗  
北寺權高殫鳳麟  
差遜太邱能達節  
真羞張儉漫依人  
鄉邦難盡清流恨  
伏臘空留俎豆新

次壁間韻

極望蒼烟入次寥  
壯遊豪興老應銷  
樓遲潘岳秋添髮  
惟悴東陽瘦到腰  
十載簿書疲斐几  
三年盾劍寄藤橋  
朝宗暫乞閒身假  
枵局何妨半劫饒

望山居幽處

傍水依山只數家，  
犁泉種石送年華。  
比鄰老友饒奇樹，  
對學新知是落霞。  
長得兒孫能問字，  
呼來禽鳥伴栽花。  
從君乞取三間屋，  
不用遙尋勾漏砂。

安平霧中用舊韻

漠漠重陰獵獵風，  
新泥沒徑屐難通。  
宵來早拭看山眼，  
剛落南宮淡墨中。

半嶺微茫一徑開，  
倚窗呵凍撥雲來。  
相逢賸有平橋柳，  
憶見山農手自栽。

村沽

初歷茅柴楫，拙新衝寒買酒，莫辭貧木蘭船上。天涯客  
一笑東風，又送春。

石虬亭

萬里南天有到時，石虬亭畔問花枝。七年三對辛夷放，  
慚愧星星鬢欲絲。

金紹驥

紹驥字竹村，天津人。乾隆五十七年舉人。官文

安縣訓導。有竹村吟稿。

津門詩鈔竹村書法董香光靜默少言風聲聞  
遠中年病廢詩如病馬云此日縱教生虎背幾  
人更信是龍文迎風無力嘶邊月伏槐何心踏  
塞雲病鶴云莫嫌憔悴精神減依舊清標異衆

禽其寄意  
亦可傷矣

早發蔡村

五更風露冷客子最銷魂  
馬蹟黃沙路雞聲綠樹村  
驛樓殘月小溪岸曉烟昏  
頻聽疏鐘度經過野寺門

丁文鈺

文鈺號蔗鄉通州人乾隆五十七年舉人官山西屯畱縣知縣

齊河道中

麥田遙望碧于苔春冷桃花半未開  
忽聽前村聲軋軋  
小車斜挂布帆來

王廷建

廷建字荔塘任邗人乾隆五十七年舉人官圍

安縣教諭有吹劍集

任邗縣志廷建博通經史過目不遺一字弱冠舉于鄉三入禮闈不第遂絕意進取專以詩歌娛自

雪霽郊行

閒訪梅花過別村  
芒屨竹杖淨詩魂  
樓鐘聲咽僧歸寺  
酒店香寒客到門  
幾點樓鴉翻樹影  
一弓新月浸冰痕  
潮橋驢背添幽興  
作賦何須擬兔園

馬學賜

學賜字葵園遷安人乾隆五十八年進士官陝

西渭南縣知縣

題高晉三小照

風雪黯征袍悲歌撫孟勞客星沈瞰浦遺像活添毫門  
閩桐枝衍楹書鶴錦韜百年傷逝賦頽頽玉山高

蔣第

第字次竹號問樵虛龍人乾隆五十八年進士  
官山東青州府同知

送家我懷赴京兆試

袖裏詩皆席上珍漫攜行卷踏緇塵如椽巨筆能扛鼎

若谷虛懷尙問津  
衣鉢此生垂白鬢  
雲霄幾輩出藍人  
槐花柳汁須臾事  
莫負青青兩鬢春

冉玉行

玉行字朗山高陽人  
乾隆五十八年進士官廣  
平府教授

悼側室劉氏

微官落拓滄河邊  
無那摧殘錦瑟絃  
花謝可憐春夢短  
月沈難望夜光圓  
自傷鏡裏休文瘦  
長憶閨中絡秀賢  
黃土一抔何處是  
雲山迢遞草芊緜

王殊渥



殊渥字佩新號古愚寶坻人乾隆五十九年舉

人官山東濟寧州知州有且住爲佳軒詩二卷

高鑑珩舅氏古愚公墓志先生初補浙江蘆泖

場大使調下砂場俸滿保薦選山東齊東縣知

縣調厯城升東昌府同知調濟寧直隸州知州

捐升道員先生精敏仁恕通達治體服官三十

年大吏倚如左右手所居民愛所去民思宰厯

城嘉慶十八年九月定陶一帶白陽教匪爲亂

先生偵知反狀已明請於大吏斬先獲教首崔

士俊等以絕覬覦厯城刑人嚮在南校場時匪

黨二千人伏南門外謀劫以叛先生調兵衛南  
校場而潛押崔士俊等於西門羅城斬之其能  
謀善斷皆此類也事平撫憲檄總理需案軍需  
清查局時三局冊卷度閱如巨山先生手目並  
用旬日之間能舉其首尾大吏信先生有素案  
非先生署押不定先生亦思有以報知已不自  
惜其精力核冊卷率至漏三四下一字未安不  
敢寢軍需報銷數百萬清查虧空數百萬皆其

子定而平反疑賦定爲信灑者亦以萬計旋有  
排先生於大吏者奏參冒濶軍需奉  
革職擊問先生之省每食兼人比瘦射聲如雷  
已而審係誤參問復原官分發山東歷署濟東  
泰武臨道鹽運

使卒年六十

紅豆樹館詩話古愚詩不多作然抒寫性靈時  
多佳句如宦清閒似鷓人意懶於春山枯春意  
晚人少髮烟寒散衙朝判牘聽雨夜鈔書移花  
醒蝶夢轉枕聽春潮孤燈聞雁夜小雨落花時  
霜從昨夜降寒覺異鄉多雨昏村入畫廟古樹  
生鱗村酒淡無色壁燈寒有花挹其風味皆淡  
而彌旨也

### 秋夜

深夜涼如此難禁月透紗乍醒忘是夢小病亦思家計  
日書應到臨風望轉賒秋聲何太急遊子在天涯

清明

我來客海外客裏又清明已覺難爲子何由慰所生松  
楸虛雨歲風雨正三更曉起衣初著春暉別有情

釣臺于睡中過之詩以志悔

此錯焉能鑄高風杳莫親星爲天上客我媿夢中人已  
過斯陳蹟無緣亦夙因蒼涼多古意風雨暗江濱

遲蔣冶師不至

鐵篴風清夜空江月白時頻年同作客小別亦相思攜  
手晴川閣聯吟黃鶴詩桂花湖上早莫負此心期

周廷俊

廷俊字子及號茶農宛平人乾隆五十九年舉

人官廣西馬平縣知縣有味雪廬詩稿

李雲章序周文狀貌瑰偉秀韻在中詩文書翰高簡有法嘉慶戊辰望議蕩粵賃屋杉湖與子過從無間郡中文士咸樂與遊君所撰著亦由是益進

題灑江送別圖爲孫紳泉時將歸蔚州

五載思歸歸不得年年卻送行人北今朝君復舍我歸  
轉索詩歌壯行色歌詩送君象鼻山行將相訪紫荆關  
關前雪片大如掌竝馬西山射虎還

夜坐聞絡緯聲書懷

何處得秋聲離邊絡緯鳴疏鐙聞孤館涼月上三更又

近裴縣候難禁別緒生來朝泛湘水迴看雁南征

題雲峯寺壁

依巖架佛廬下瞰灘江水坐久來雨聲檐頭落榕子

邊士圻

士圻字芸坪號爽軒任邱人士培弟乾隆五十九年舉人官山西神池縣知縣有爽軒集四卷

松樹塘

東秦浚晨發車羸午暫停小橋翻浪白細雨洗山青路曲如旌磨峯高可摘星客來探古蹟一問漢碑亭

八月十五夜同意菴玩月

月色涼如許，躡人意若何。莫將兒女淚，流入隴頭歌。擊劍盞光亂，張琴夜露多。非君能好我，底事屢相過。

乙亥冬赴靖邊關

耿耿星河欲二更，驅車未至靖邊城。風高遠戍笳聲壯，月黑遙山虎眼明。七尺常懸歐冶劍，三年從事耿恭營。何當一洗書生懦，獵取黃羊手自烹。

施德寧

德寧字靜遠，號致園，靜海人。乾隆五十九年舉人。有致園詩草。

擬謝元暉京路夜發

策馬去坦道迢遞逾嶠岑寒月浸彼岸繁霜惹我襟  
明珠疇暗遺星光燦林陰錦繡帝王都迴首何靜深  
飄蓬慨蹤蹟浮雲嗟古今寥寥邁征意悠悠跋涉心抽思  
愁寡和烏啼亂余吟

李泉

泉字水薊宛平人乾隆六十年進士官山西平

遙縣知縣

西樓對月

湘簾半捲夢初醒睡月團團入畫櫺  
萬里秋光空際得一樓虛籟靜中聽  
霓裳有曲今誰按玉杵無聲夜暫停

真怪嫦娥嬌不語早從雲外遞芳馨

步毓巖

毓巖號蔭軒棗強人乾隆六十年進士官河南  
泌陽縣知縣有樂飢草堂詩一卷

秋夜旅宿

返照竹林西斜陽送馬蹄村環清澗水人過碧山蹊皎  
月銜峯上疏星傍戶低徘徊空砌下四壁晚蛩啼

送客

吟鞭何處去攜手送君遊江遠拖明練沙多起白鷗關  
山千里夢風月五湖秋驛使他年至遙憑報隴頭



都中秋夜別李明經春臺

客中送客最關情，涼夜殘杯盡意傾。  
話到更闌人寂後，夢魂已逐雁南征。

沈樂善

樂善字戢山，號秋雲，天津人。乾隆六十年進士。  
官貴州貴東道，有黔中草。

津門詩鈔公讀書攻苦步趨方正  
歷官二十年風操介然家無擔石

夜宿雲母山

一徑緣松腳，巖扉鎖石清。  
溪雲釀花氣，山雨入泉聲。  
筍蕨僧厨味，壺觴旅客情。  
薄眠空翠裏，竹月夜深明。

李肄頌

肄頌字彥三號松潭滄州人廷敬子乾隆六十年舉人歷官雲南臨安府知府有放鶴軒吟草  
送范梅仙之任粵東

扁舟昔向武陵去曾唱驪歌爲送行十二年來重聚首  
八千里外又孤征家山風景君須記宦海波濤我亦驚  
應有坡公遺愛在甘棠到處繼難兄

王殊澤

殊澤字泗和號雨膏寶坻人振榮子乾隆六十年舉人官河南登封縣知縣

之官四川留別諸兄弟

客子將之蜀殷勤屬弟兄居家惟儉約處世必和平母  
老身多疾兒癡學未成臨歧三四語無限別離情

田籍

籍字千畝號敬亭大興人志勤子乾隆六十年  
舉人官貴州候補知縣有篤慎堂詩集

安陸

二月春深杏頰肥濛濛江上雪花飛南來已是三千里  
安陸城邊添客衣

登金山妙高臺

妙高臺迥薄雲霄  
幾欲臨風挂酒瓢  
夜半魚龍吹沫上  
鐘聲直接廣陵潮

梁瑞霖

瑞霖字鷗汀正定人  
乾隆六十年副貢生  
官江西新德縣知縣

早起

曉起倍清華  
疏籬多豆花  
呼童先汲水  
盥手自煎茶  
空際辨微雨  
樹頭驚曙鴉  
相隨小兒女  
一摘晚畦瓜

國朝畿輔詩傳卷五十二終

國朝畿輔詩傳卷五十三

長洲陶 樛嶷薊輯 寶坻高繼珩寄泉校

田玉

玉字香泉易州人官浙江杭州府都司有附蓬

小草一卷

袁枚序先生遺稿天真爛漫意到筆隨深合古  
人為詩之意 本朝藝文志中可自成一家人  
止與南朝沈慶之

曹景宗爭勝也

龍鐸序香泉先生以學士詞宗出為將軍武庫  
瑀泉卜築詞源湧萬斛之珠黍谷閒吟墨審灑

三春之露山川鏽錯能言難顯  
之情風土羅陳每得無心之妙

隨園詩話田涵齋文龍宰長洲政聲廉明其父  
香泉先生就養署中終日跨驢游虎邱石湖間

句如海昌塔廟思歸云長魚跋浪飛寒雨宿鳥  
驚林隨折枝寒莊旅店云遙從寒水孤村外一  
角青旗認酒家樂安莊燕集云林塘得雨鱖魚  
戲麥龍連雲布穀飛春興云紅杏埭長回峽蝶  
綠楊牆短出鞦韆寬杯酌酒愁心醉大  
字鈔詩笑眼花俱有夷猶自得之趣

金山夜月

浩淼秋空夜金焦相向明亂檣楊子渡遠火潤州城風  
定鈴無語江流月有聲應知香海內大塊總浮生

季冬丹陽曉望

霜氣逼朝曦寒城尙閉門破垣孤塔寺禿樹遠人村地  
起來山脈潮迴露水痕雲陽舊館驛每過一銷魂

首夏任城使院卽事

依人無悶此棲遲深院高軒事事宜拂面柳風剛作陣  
溼衣梅雨未成絲棋聲點案閒中味花氣薰人覺後知  
一謝故交慵不起倦遊咫尺隔南池

虎邱讌集

喧喧歌吹趁時遊雲斂天香正及秋詞客舫依沿岸樹  
美人簾卷傍山樓但看七里花成市肯信三生石點頭  
自是江南佳麗地吳儂知樂不知愁

孫鳴鐸

鳴鐸字木齋天津人諸生有木齋小草

津門詩鈔公與  
弟鳴鑾俱能詩



冬日宛州道上

古道斜陽晚輪躑莫暫停沙痕闢老樹冰壘圻迴汀草  
盡堤全白山枯石不青試尋投宿處前路有旗亭

重陽口占

對酒吟詩興轉狂老人幸未負重陽折來黃菊羞簪鬢  
恐惹星星髮上霜

夜雨

高館淒淒冷畫屏西風吹雨打疏檣挑鐙欲展悲秋賦  
滴碎殘荷不忍聽

丹楓零落雁初回閣外寒陰護綠苔廿載半騷今夜恨

和風和雨上心來

黃 鎰

鎰字敬哉元城人諸生有鶴陰堂詩稿一卷

雜詩

高堂倚虛碧門外臨清流盤根二古木枝幹擎蒼虬香  
杭初踐碓春酒新開筍垂綸得鮮鯉聊以備晨羞戴笠  
出門去南畝事耨耰孳尾感物化羣鳥鳴啁啾白華何  
燦燦華黍更油油慚愧古人意行歌渡隴頭

紀會華

會華字芬圃文安人諸生有暗香書屋詩稿

林處士墓

處士墳何處，孤山翠竹中。  
梅開三徑冷，鶴去一亭空。  
石砌埋殘碣，湖波映晚虹。  
不知千載下，誰更繼高風。

夜雨

鐙暗香銷雨未收，蕭疏庭院紙窗幽。  
丁園綠徧池塘草，午夜涼生枕簟秋。  
夢破芭蕉三徑裏，吟殘促織五更頭。  
明朝試看芙蓉色，遮莫啼紅逐水流。

解培埒

培埒字築巖，慶雲人。諸生有鬲南詩草。

十載

十載無家客風塵欲白頭漸離燕市筑王粲楚江樓  
賦金難贖傭書筆未投昂蔽丈夫志且付釣詩鉤

王樹門

樹門天津人

津門詩鈔樹門有遊秦晉詩草如次陘山驛云  
官槐驛路秋聲滿野草官牆夕照閒安邑途中  
云陶唐田井三千載夏后提封四百年過驪山  
云豐樹夕陽連渭水灞陵秋色近長安華清宮  
云一自飛塵驚玉輦遂教  
湯殿掩金沙等句皆可誦

風陵渡河宿潼關

擊柝黃河夜度關滿川明月灞城山帝王都會藩籬處  
秦晉封疆指顧間烽火不驚金鎖固魚龍潛伏水波閒

五更官燭銷紅盡千里鄉心逐夢還

春雨

盡日霏霏盡夜長隔簾草色帶泥香  
春城薄暮千家暗  
邊地重陰二月涼  
池水細生新鴨綠  
柳條輕染淡鵝黃  
驚心物候悲遊子  
雲樹蒼茫憶故鄉

登代州譙樓

舜廟空山石磴迂  
趙王城堞久榛蕪  
雲間峻嶺飛狐隘  
天外奇峯過雁孤  
邊畧至今思李牧  
河聲終古笑扶蘇  
雄圖霸業銷沈盡  
黯淡秋陰下野烏

一自陳稀據朔方  
漢家始闢雁門疆  
金笳細柳調征馬

玉枕蒲萄醉戰場周衛功勳餘故壘李程營陣付斜陽  
燕支塞遠人千古青冢魂歸夜月涼

古柏蕭蕭望晉陵殘唐帝業一人興沙陀龍起回青海  
朔漠鷹揚振白登百戰軍中遺宿恨三垂岡上見風稜  
于今絕塞餘抔土落日荒原蔓野藤

劉因矩

因矩字絜方號雪村慶雲人貢生

冬夜

窮冬爲客日孤館易黃昏蕭瑟風畱樹清寒月到門犬  
聲來遠巷人語靜荒村幽寂憑誰破新醪試一溫

朱克振

克振字肇修南宮人官陝西曲江縣縣丞有方

有齋集

南宮縣志克振詩學中晚唐能白陶寫其性情間有入盛唐者誦韓文公爲崔斯立題藍田解字記曰余方有公事子姑去名其稿曰方有齋

燕臺懷古

官城落日晚烟平郭隗臺空蔓草生老樹寒鴉同黯淡  
碑荒冢弔清明驚沙久沒昭王壘古道猶傳耶律營  
我亦頻沽燕市酒悲歌那復見荆卿

姜貽縉

貽縉字綬亭號卿雲大名人貢生

山堂

山勢鬱嵯峨虛堂映薜蘿白雲當戶滿紅樹隔簾多麋鹿閒爲友羊求曰放歌主人能覆局幽興近如何

春日

十笏青山揖草堂憑闌小坐看斜陽不知何處春風過吹落松花滿地香

李美

美字純之號醒菴虛龍人貢生有清華堂詩鈔



溫序斌傳先生生而篤厚孝友性成家素貧刻苦向學性尤喜詩得溫厚和平之旨晚年旅食桃林徐流諸塞其詩盈萬篇吾邑至今談風雅者咸宗尚之號曰樂吟先生卒年七十五

榛子鎮

雨後沙路平夕照明村堡驅車過石橋泉聲殊浩浩近指炊烟生遠望山雲掃翹首渺赤峯離緒縈懷抱衰柳更呼風秋滿灤陽道

秋柳

秋雨秋風閱幾朝疏慵無力舞宮腰已看水面垂垂老猶向霜前冉冉飄去日小蠻思婉婉當年張緒臘蕭條卻憐瘦影蒼烟裏尙送行人過灞橋

紅坡卽景

閒聽鳴蟬過柳溪  
雨餘沙路潤無泥  
居人應愛斜陽好  
帶柴門盡向西

王企會

企會字紹宗號西亭開州人諸生有西亭集

馬允剛序西亭集學晚唐其色澤  
之鮮潤運思之周密正不易及

自遣

蝸殼蓬莖可寄居  
人情不必問何如  
籬邊野菊憑開落  
天上浮雲自卷舒  
隱學逋仙閒養鶴  
達同莊叟但觀魚  
消閒鄴架搜遺籍  
補讀從前未見書

舒其紳

其紳號蘭圃任邱人歷官浙江鹽運使

梁同書舒公墓志公生而岐嶷讀書刻苦自勵  
凡書史中有資經濟者每心領神會弱冠列博  
士弟子援例赴部需次縣令初任山東滋陽河  
南陽橋河漫奉檄辦料運工備用公以隔省運  
送重傷民力且境內採買慮有影借勒派之事  
卽捐資赴豫購辦閭閻若不知有是役者毋喪  
服閱補陝西鄜縣調咸陽擢知榆林府事調同  
州又調西安以卓異薦調甘肅蘭州時值回逆  
初平冒賑素發前後刺訊以待奏成者無虛日  
公挾摘蠹蔽撫卹凋瘵升浙江鹽道兩浙地廣  
課繁簿籍糾紛出入乾沒之弊不可殫究公清  
釐整飭要歸于卹商惠民而後已卒年五十有  
五

泊南鄭

風景樂州好舟行景更幽山從褒谷盡水向漢江流  
漁火明沙岸灘聲出石頭鄰船聞夜語忽憶武昌遊

重過清華鎮和李童山太史壁間韻

策馬覃懷路楊花拂面輕撩人春草色破夢曉雞聲  
風景會相識雲山舊有名天邊新月好旅客幾含情

春寒

邊地鶯花少黃沙漠漠飛節鶩過穀雨人怯換春衣  
殘雪明高嶺荒雲映落暉長安楊柳色此日正依依

冬日過綏德州

上郡雄關久著聞幾回駐馬倍情殷牛羊亂下雕陰雪

鷹隼高盤雁磧雲賞月臺空悲帝子朔方城壞甲將軍  
傷心無定河邊水終古寒濤映夕曛

鄭濟燾

濟燾字敷敬號玉峯豐潤人官至江蘇松江府

知府改補刑部廣東司員外

舒位書鄭玉峯太守平苗紀事詩後綠海參軍  
日紅江殺賊時同行萬里路遲讀十年詩鹽政  
奉蔬菜弓衣繡竹枝相  
逢笑紕緹我亦杜分司

塞上吟

乾隆壬辰予以渝州倅從戎討兩金川丙  
申二月寇平辦善後於噶拉依詩以誌之

纔據雕鞬志已奇龍泉知我一身隨幸當太乙開鋒日  
喜見蚩尤授首時不惜窮邊消歲月矢將駑力効驅馳

何期鞅掌風塵吏也控天弧逐虎豹

查淳

淳字梅舫號篆仙宛平人禮子歷官大理寺少

卿

孔昭焜查淳行狀梅舫善篆刻故別字篆仙丁  
詩爲沈確士厲樊榭萬柘坡諸老所器任四川  
南江令邑有大巴坪深林密箐人蹟罕通君白  
大吏聞縻莽招土著歷攝通江巴州南部事每  
曰所謂知縣知州者於州縣民瘼無弗周知與  
利除害乃爲稱職耳旋調宜賓時金川軍興奉  
檄總理軍需政務填委綜理裕如欽使李公  
湖將軍阿公桂深倚重之升雲南趙州牧後擢  
廣西平樂守有事安南上曰查淳向在  
四川理軍需稱幹練其令速董厥成阮藩額降  
以卓異薦所屬全州飢糞民肆掠勢張甚君密  
遣幹役偵獲首從分別懲創之居民安堵簡江

蘇常鎮道糧艘膠水次君勉日濬治漕船無滯  
補湖南糧儲道黃水泛溢轉運維艱君擘畫有  
方履險如夷晉江西按察使贛州民變或欲與  
大獄君曰吾不忍以人命爲菅蒯也置渠于法  
餘省釋入爲大理寺少卿旋賜六品銜  
致仕君天性肫摯尤篤于任郵宗人二瞻居士  
國初老宿流寓維揚沒無子君爲表墓立祠  
焉生平邃于學尤彈心經濟少隨父儉堂公任  
粵西講求水利著  
廬渠紀畧三卷

弔常理齋刺史殉木果木之難

重述金酋事縈懷殉節人死亡惟義在 恩恤自天申

雪微畱芳躅雲山仰絕塵慰忠祠宇在俎豆四時新

王昭

昭字建中號鹿埜天津人諸生有臥隱齋詩草

津門詩鈔鹿埜少負文譽工填詞度  
曲與吳念湖太守並有風流之目

約埜航飲酒比來而余已醉醒後以詩謝之且訂

後約

蓬門開處半緣君有約翻忘迓子雲短榻暫時稱臥隱  
醉鄉直欲與平分夢回破屋勞仙枕棹返寒溪冷練裙  
明日定移東郭履黃花白酒細論文

崔大本

大本字道源號溪亭慶雲人諸生

津門詩鈔道源先生七歲而孤事母至孝沒後  
曉林免許大江爲繪寒宵煮豆圖一時多題詠  
南皮張硯溪少京兆端城詩云秋風無定樹菽  
水有餘歡庸行談何易婉容畫恐難蓋道其實



遊華不注山

間遊山下路緩步到禪林院落新花發庭階古木深石  
橋橫野水香閣映遙岑塵外逢僧話悠然起遠心

田家

茅廬臨水近樹裏隱蓬門閒坐聽蟬噪新晴見屐痕牧  
童吹竹笛饒婦餉壺殮太古風猶在牛羊散野村

王彤

彤字禹城號霞峯東光人諸生有霞峯詩草

丁巳元日

元日風光好家家彩燕新傲裘纔度臘霜鬢又逢春尙

有陶公酒何妨原憲貧世間知己少肯作獨醒人

張樹萱

樹萱字研莊天津人官江西布政司理問

津門詩鈔研莊爲人疏宕自喜歌場酒地微逐無虛日與同邑吳念湖太守王建中茂才俱善謳歌風流傾動一時

問春

二月輕寒尙擁鑪冰漸未解雪還鋪不知江畔春消息  
綠到垂楊第幾株

王寶堅

寶堅字豈匏吳橋人履吉子有冰雪齋詩草

過武城

入境思先哲遲遲首自搔  
烟寒浮樹迴岸古抱城高  
跋涉嗟千里登臨愧二毛  
不知今日宰可復用牛刀

題盧生祠

來往邯鄲客祠前爲拂塵  
不知身是夢又拜夢中人

魯 鏐

鏐字健菴號泓如天津人  
布衣有耕心堂草一

卷

津門詩鈔公嘗學詩於黃竹老人以冷烟  
瘦鎖孤僧寺春草寒依遠客槎句得名

題書室

茅廬不擇地適意便爲家  
愛貯書連屋閒鋤草礙花琴  
調清晝永藥鍊午烟斜  
更喜柴門外堪停問字車

霍紫綬

紫綬字宸章東光人備孫監生

下邳

湖水潺湲抱郭斜  
西風撲面卷蘆花草橋進履人何在  
落日荒城噪暮鴉

淮安夜泊

孤城月影雁連天  
畫角沈沈動野烟  
半榻殘燈千里夢  
黃華亭下一宵眠

梅履端

履端字雅村天津人有拙石山房詩草一卷

津門詩鈔王成烈曰舅氏中年學畫遂成絕藝  
竹法文與可蘭法鄭所南尺幅片紙爭購爲寶

遊蹟半海  
內卒不遇

遣懷

時乖何所託老屋且埋頭儘有書中味能消靜裏愁  
竹寒雙屐雨菊瘦一瓶秋往事今全悟休言志未酬

瓶梅

膽瓶閒插小梅花移映書窗日影斜骨格雖寒風味古  
自宜相賞在貧家

表止瑞

正瑞號瑤圃靜海人諸生有蕉窗存稿

讀陶詩

閉門秋色裏風葉滿階除獨翦窗前燭閒披案上書寒  
蟲秋院靜涼月夜堂虛此際心偏遠淵明實啟予

水仙

冷落仙蹤幾度秋春風一夜別滄洲嫩金低綴明瑞小  
膩玉深嵌寶釧柔疏幌月寒迷舊夢閒庭烟重鎖清愁  
洛川空感陳王賦搔首凌波恨不休

寶徵榭

徵榭宇桂園豐潤人諸生有征次吟岳陽吟草

王庚序舅氏桂園先生負不羈才詩灑然出塵  
丁母憂築斗室坐臥其中悲來輒哭遂嬰痼疾  
年三十而歿舅氏一門風雅長姊蓮溪次姊蘭  
軒俱嫺吟詠著竝芳集行世蓮溪有詠虞美人  
句云妾心甘逐微芳隕不共飛花入漢宮蘭軒  
有助夫子禪祭句云他時縱遂男兒志列鼎難  
酬孝子心俱  
立言有體

揚州

扁舟下綠水撥棹過維揚隋帝今無樹歐公此建堂漕  
鹽當孔道淮海接廢疆所恨非初夏難逢芍藥芳

過小孤山

見說潯陽地揚帆此日經小孤傳勝蹟廣殿祀娉婷浪

卷千重白山畱一綫青應知神力大安穩鎮洪溟

淮安卽景

烟水見三洲分疆古楚州誰能知帶劍我欲賦登樓地  
足漁鹽利風生葭菼秋築堤應鞏固安穩障黃流

江寧懷古

扁舟秋向秣陵過弔古頻教喚柰何形勝至今猶巨鎮  
英雄終古付江波蘆飛亂雪青溪晚柳帶斜陽白下多  
撫景蒼涼西去客興懷慷慨一悲歌

王廷樞

廷樞字蘆汀滄州人耿光子貢生官廣西桂陽



縣知縣

夜過洞庭

曉發武昌門夕渡黃陵汜日暮江帆遲洞庭入百里微  
風澹無波明月照天水隱隱見君山鐘聲翠雲裏

見落花

花飛欲暮天飛向阿誰邊東鄰有思婦莫墜綺窗前

張述架

述架字訪漁任邱人諸生有訪漁稿

聞砧

故國思千里清砧處處多遠人聞也未長夜冷如何楚

楚聲偏急織纖手定呵底須催木葉客鬢欲先皓

胡睿烈

睿烈字炁齋天津人諸生

津門詩鈔炁齋有人日立春同人集午晴樓調  
寄一萼紅呈朱七橋先生詞云峭寒天有含枝  
殘雪晴壓畫樓偏竹葉分盆芹芽改席宜春帖  
子頻粘憶此日鏤金人瘦綴釵梁錦石小如錢  
最是關心何堪重賦雁後花前羯鼓聲清畫  
漫甯情湘管調寄紅絃積水雲輕擘絳風細早  
又深院新蠶恨倚徧闌干十二湖往事  
都付夢中烟欲譜新詞折柳怕到啼鴉

過慶國寺訪子慈上人

乘興來初地風高海色殷斜陽孤磬渺古道兩松閒鶴  
子時依佛鮫人夜叩關支郎緣法妙相對說無還

過宜亭舊址

清絕城西路繁華幾日春  
管絃空燕語屏障但疑塵  
無復傳觴地猶多看竹人  
風流不可問溪水碧粼粼

喜高三孝廉藹重來津門卽席分賦時上巳前二

日

故人不見又三年海國重逢笑拍肩  
芳草綠齊調馬路春波晴展浴鷗天  
未容車轍喧門外依舊鶯花繞屋邊  
太息流光彈指過幾時歸辦買山錢

駭綠紛紅色斬新城南韋曲最宜春  
當門時拂惺忪柳入座都無襜褕人  
但乞一觴兼一詠莫論誰主復誰賓

水嬉尙有湖亭興小海歌中走馬頻

註石璞

石璞東莞人諸生

秋日村居

暝色延林徑歸來興尙存雞棲秋樹頂蛩語古牆根作  
字書蕉葉移花入瓦盆蕭然吾自得此意與誰論

張錫寧

賜寧字桂巖號坤一滄州人官南河通州州判  
有黃花吟館詩集

津門詩鈔公工繪事遊京師與羅兩峯山人曠  
齊名紀文達公酌法大司成式善尤重之晚年

罷官僑居揚州傳

畫法於長子百祿

李兆元十二筆舫雜錄挂巖工寫生潑墨淋漓

饒有逸致瑤華道人詠百合花詩云瓦注何妨

種玉姿如蘭芳韻兩三枝天然

太素無人識寄語滄州老畫師

墨香居畫識坤一山水精

妙於芳渾厚超然拔俗

曾煥贈張桂巖詩張侯作官二十年不進一階

無一錢所得江南好山水宦囊傾倒皆雲烟

開揚州五湖白雲接荆門萬峯碧朝暉彩翠明

當空暮雨蒼茫入無極中間忽曠忽幽阻誰為

翦裁誰為補張侯對此融心神大笑有緣官此

上今人作畫但撫古閉塞天機習規矩天然粉

本在目前何必荆關復董巨日從簿書苦不閒

簿書正患規矩煩一如論畫取形似有法無意

徒昏昏亟召家人將酒至要為胷中洗腸胃三

杯徑醉神忽來落紙片青盜生氣昨來為我圖

谿漁舊游宛在西子湖波光裔裔蕩蘆藹風勢

獵獵翻菰蒲沙鳥取餌意將發舟人招手如何

題畫

呼餘暉圖外更縹緲元氣殆與青冥俱張侯時  
亦寫花竹著墨無多姿致足名家畫品何由  
襟抱過人差免俗張侯不減曹霸貧終日坎壈  
纏其身或有諷之求富貴看山還復行江濱

秋高天宇清蘆花滿洲渚渺渺萬里江孤帆向何處

金陵閒眺

萍動知魚上春深覺燕忙可憐金粉地一片菜花黃

靈隱道上

翠濤萬派潑長松幽庵橫茅復幾重不解清泉何處落

深山送出午時鐘

燕子磯

燕子磯頭燕子飛，朝朝送客帶斜暉。秋來燕去磯仍在，只有天涯客未歸。

左之準

之準號陰江河間人，貢生有百藥堂詩稿。

曉行過趙北口

策馬雞鳴後，歸程趁月光。夢隨孤戍遠，愁轉五更長。日出烟村曉，風搖隄柳黃。十三橋踏徧，不語自悲涼。

沈銖

銖字季掌，號青來，天津人。有六琴十硯齋詩草。

墨香居畫識青來山水師石田翁花卉宗懌南田常游京師孫華主人雅重之生平慕黃山之

勝借程音田考功至歛與莫山人葵齋裏糧同  
游山中怪石古松奇葩異卉咸爲圖繪無不逼  
真

題畫冊贈程亦園中翰

萬木飛黃葉霜風酸客心關山無伴侶驢背自孤吟

王本仁

本仁字聚之號梅村東光人諸生有菘香堂詩  
草

客鈞陽將歸甯別唐虞階

輕裝欲束馬頻催又是浮生夢一回寄蹟不殊鴻爪印  
還轆猶及菊花開囊空愧比西陵石誼厚難忘北海杯



別後何堪重回首西風斜日冷鈞臺

甯岐昌

岐昌字離階號支山樂亭人諸生有又新堂詩

稿

寄友

天涯君遠別孤鳥寄秋林信斷雲山隔思深夢寐尋屋  
梁千里月膠漆五年心若遇長天雁還須寄好音

山行雜述

山行人不厭况復趁春和虎露峻嶒石龍分大小河無  
名林鳥語隨意嶺雲過忽有樓臺現平城夕照多

黃掌綸

掌綸字展之號吟川大興人官國子監典簿有

春倪草堂詩一卷

蔡本俊序吟川于詩古文詞書畫篆刻無不精妙名重一時論者以文待詔目之

墨香居董識吟川幼沈潛篤學尤酷嗜金石文字詩學杜樊川許丁卯行楷書俱有古致旁及繪事師法荆關用筆嫺潤布置寬閒有大家風格

津門詩鈔吟川書學山谷瘦峭多姿畫亦適逸不俗

送葛寶光南歸

與君擘襖入成均文字知交誼最親此日河橋傾別酒  
數年風雨聚同人櫺門石鼓探奇篆燕市銀峯逐輓塵

惆悵黃金臺畔望鳳城楊柳不勝春

樊宗澄

宗澄字鑑塘天津人宗浩弟諸生有寒竽集

常州晚發

霏微細雨暮春天江柳低垂輒欲眠一帶紅燈依綠水  
靚妝人在畫樓邊

王孫蘭

孫蘭字紫暉慶雲人諸生有晴雨軒詩草

卽事

舍南舍北盡清渠半種來牟半種蔬  
踏罷桔槔無一事

綠楊影裏自翻書

鮑琮

琮字澤方通州人諸生

雨中有懷高參之

花事飄零暮雨天東風併力送流年  
衡門近日經過少茗椀詩筒一悵然

李泰

泰字讓山宛平人

看杏花

數枝濃豔映窗紅無限韶光入望中  
不負栽培開似錦

一鞭垂袖領春風

史鑑

鑑字晉狐號鏡湖天津人貢生

津門詩鈔先生工楷書性方正以古道勉後學  
高春江孝廉潮少受業於公卒無嗣春江葬之

卽事

雁起渾無事庭前得自如  
野花三徑滿村酒一盃  
餘詩  
蓬層雲起人緣積雨疏  
荒園秋又到搔首獨脚踟

曹煥

煥字闇然通州人諸生

送客

駿馬嘶垂柳清尊對落花離亭一步地門外卽天涯

郊行

桃花紅落李花明桑葉青時布穀鳴  
賸有閒田耕未畢綠楊烟裏叱牛聲

金銓

銓字鈞衡號野田天津人諸生有野田存草

津門詩鈔先生書法鍾王詩宗陶阮高淡不慕  
榮顯阿雨窗林保都轉長蘆聞名造訪李海門  
符清宰天津贈句云六書緒登善五字韋蘇州  
與康達夫郝石雁查次齋周大迂結社聯吟卒  
年七十餘

寄芥舟先生

別是初春夏又過陰陰庭樹鳥備歌貧中世慮消難盡  
靜裏離愁感更多沾上備書今復爾長安賣畫近如何  
倘逢斯道堪容處願負奚囊出薜蘿

邵廷杰

廷杰字雪樵寧河人諸生有清吟巢詩鈔三卷  
雨後薊門道上望東北一帶諸山

遠山凝佛頭雁齒排霄漢畢呈造化奇勢壓雄且悍蜿  
蜒趨遼東千夫莫能扞崆峒指何峯田盤隱復見譬彼  
烈丈夫衣冠新激盪覩我驅車來雲端近相喚天地大  
光明表裏朗初且千層萬層紫一一斜陽散爽氣浸心

脾長歌倚天半

穆得元

得元字東軒固安人官延慶州訓導有漸于集

三卷

官舍夜吟

廣文官獨冷僻地恰相宜  
寒近迎寒早山深得月遲  
課書頻翦燭看劍幾傾卮  
吾自尋吾樂良宵一詠詩

夏日卽事

近因幽興極全與世情疏  
掃徑苔凝帚耘花蝶避鋤  
鑪烟看裊篆鼎沸聽盤車  
倦臥時成夢人來送異書



趙庭荃

庭荃號湘三涿州人貢生有湘三詩稿

晚入上房山

支筇萬嶂來深入白雲隈撥草尋人徑攀蘿上石臺寺  
門敲薜荔僧院鎖莓苔一點秋鐙閃茫茫紫翠開

漫興

六十四年人蕭騷鬢似銀才先今日盡家甚昔時貧籬  
菊香如故園菘味又新老難忘素業鐙火夜窗親

晚行

碧雲黃菊冷秋光馬尾塵飄道路長最是旅人魂斷處

兩行衰柳送殘陽

雪中

寒光一片照孤村  
鴻爪依然是舊痕  
抱膝高吟消歲暮  
有誰來叩雪中門

新秋

深巷行來步步幽  
人家清似入新秋  
涼風一陣來何處  
吹落槐花亂打頭

戈响

响宇或蘭號東扶  
景州人諸生有味素山房詩

夏日粒槐菴雨霽偶筆

矮屋不受暑悠然佳趣生一簾新霽色高樹晚蟬聲墨  
瀋滴逾潤茶烟霏更清塵心頓開豁何必羨蓬瀛

國朝畿輔詩傳卷五十二終